


Mag. St. Dr.

kat. komp.



220257

Sanctissimus Dominus Noster PIUS PAPA VI. habita benignè ratione precum , quæ Serenissimi Regis ac Reipublicæ Polonæ nomine , de imminuendo dierum festorum numero , qui ex Ecclesiæ præscripto vel consuetudine celebrantur , ad ipsum haud pridem pervenerunt ; expensisque alijs ejusmodi postulationibus ac precibus , ad Summos Pontifices prædecessores suos delatis , tum relationibus ab Illustrissimis & Reverendissimis Regni & M. D. Lithuaniae Archiepiscopis & Episcopis hac de re alias acceptis : haud amplius differendam censuit Dispensationem , quæ illud spectat , ut populus , commodioribus sibi comparatis vitæ sustentandæ rationibus , nova hac excitetur Ecclesiæ indulgentiâ ; atque in accuratiorem ceterorum festorum dierum , qui erunt ex præcepto colendi , observantiam alacriter feratur .

Huiusmodi igitur pro Gente Polona indulgentiam Sanctitas Sua ad normam ordinavit illarum , quæ locum jam habuere in partibus dioecesium , quæ alienas attingunt dominationes , ne cultus diversitas in eiusdem Ritus populis , ad unam eandemque dioecesim spectantibus , ullam parere possit , inter idiotas præser-tim , confusionem vel perturbationem , & conscientiæ simul sollicitudinem . Quod verò in iis locis jam laudabiliter obtinuit , ut & festivi qui retinentur dies maiori nunc celebrentur veneratione ,

) 1 (

& reli-



& reliqui in pauperum redundaverint utilitatem , illud itidem a
pia Polona natione Summus Pontifex sibi cumulate pollicetur.

Ægre tamen graviterque accepit , pravam in hoc Regno
invaluisse consuetudinem , ipsimet Constitutionibus Synodalibus
(lib. 2. tit. de Feriis) reprobatam , ut nundinæ ac venalium re-
rum publici mercatus , ut plurimum , festis diebus habeantur : quod
quantum Christianæ ipsorum observantiæ obsit atque aduersetur , &
experientia docet , & sapienter prædecessorum suorum vestigiis
inhærens admonuit s. m. Benedictus XIV. in suis literis sub an-
nulo piscatoris die 5. novembris anno 1745. datis , quarum ini-
tium : *Ab eo tempore*. Ceterum , ex quo eiusmodi pontificiæ dis-
pensationes concessæ Austriacis ditionibus fuere , oculatus ego-
met ipse testis fui , quanta & quam singulari vigilancia festorum
dierum sanctificationi consultum fuerit , eorumque proinde exac-
tior observantia accreverit ; quam severè nundinæ & mercatus
omnes interdicantur ; imo nullæ penitus officinæ vel tabernæ ven-
dentium vel ementium commodo prostent , ac certæ dumtaxat ,
eaque paucæ præfinitæ sint horæ (quæ nempe sacris exercitati-
onibus , ac divinis vacant officiis) , quibus vendere atque emere
liceat res quotidiano victui omnino necessarias: sed hoc ipso intervallo
omnes in officinis ipsis vel tabernis conventus , convivia , ac
ludicra quæque & profana , omnino prohibentur. Præclarum sa-
nè , ac nunquam satis laudandum Augustorum in Deum pietatis
documentum !

Hoc igitur proposito exemplō , nihil est , quod a natio-
nis etiam Polonæ pietate sibi Sanctissimus Pater non pollicetur:
atque hoc ipsum mihi planè mandavit Illustrissimæ & Reveren-
dissimæ Dominationi Vestræ non minus , quam ceteris collegis
suis , disertè significandum , ut dum novæ pontificiæ dispensatio-
nis beneficium populis , eorum fidei curæquè commissis , erunt
promulgaturi , iisdem eo ipso tempore justissima ac piissima
Sanctitatis Suæ consilia ac monita patefaciant ; adeo ut pastora-
lis sollicitudo nullis parcat rationibus , quibus possint tales abu-

sus .

sus, ubi invaluerint, coerceri. Hinc uhumquemque moneant, in Domino hortentur, excitentque ad exactam hanc dierum festorum observantiam; ac si opus est, adversus transgressores opem etiam implorent sacerdotalis auctoritatis, ut qui Ecclesiæ, conscientiæ causa, obsequi detrectaret, pœnarum saltem metu refrænetur & adigatur.

Audivit etiam Sanctissimus Dominus noster, eam esse aliqui cubi *Kmethonum* seu glebæ adscriptorum conditionem, ut vix ultimum hebdomadæ diem ab operis domino præstandis exceptum habeant; vel eas statim diebus ita assignataas, ut nisi Festum aliquod iisdem diebus inciderit, non possint ab operibus domino præstandis se abstinere. Verum ea est Sanctitatis Suæ fiducia, quam in huius nationis religione, pietate & æquitate locavit, ut sibi in animum nequeat inducere, futuros esse dominos, qui miseros homines adignant ad deferendas festis diebus abrogatis eas operas, quas, stante ipsorum dierum præcepto, exigere ab iisdem usque adhuc non potuerunt. Nihilominus ad magis magisque bonorum animos excitandos, operæ pretium Sanctissimus Pater arbitratur, per sacrorum pastorum vocem, & dominos, & servos admonere, se novo hujusmodi beneficio illud præcipue spectasse ac sperasse futurum, ut eorum, qui in sudore vultus sui panem comedunt, indigentiae commodiūs provideretur: optare propterea, vehementerque petere, ut cum domini nullum opus aut ministerium diebus festis, qui ex præcepto vel consuetudine servabantur, à servis suis alterutri conditioni ut supra obnoxii, exigere usque adhuc potuerint; ita neque in posterum repeatant, etsi eorumdem dierum servandorum præceptum, ex benigna erga pauperes pontificia miseratione, abrogetur.

Hæc igitur habui ex Sanctitatis Suæ supremis mandatis Illustrissimæ Dominationi Vestræ ac ceteris collegis suis, novæ pontificiæ indulgentiæ participibus, communicanda. Doctrina, studio atque obsequio erga Ecclesiæ caput suo vehementer confisus, dubitare nullomodo possum, quin Illustrissima Dominatio Vesta singulis cuiuscunque statu personis, spirituali curæ suæ subje-

ctis, manifestam Sanctitatis Suæ mentem non sit declaratura, easque etiam ad eius executionem excitatura iis hortationibus & monitis, quæ tum perspecta sua prudentia, tum rei argumentum atque ipsæ Apostolicæ literæ Sanctissimi Domini Nostri, Illustrissimæ Dominationi Vestræ abundè suppeditabunt. Hæc autem omnia in Edicta referre iuvabit, quæ vulgo *Processus* dicuntur, quibus populo suo novam pontificiam dispensationem denuntiabit. Omnes autem parochos, Verbi Dei prædicatores, & confessarios, tam sacerdotes, quam regulares moneat, ut populos diligenter, uti opus est, instruant, tum de ratione, qua dies festi sanctificari debeant, quo ardore, quo pietatis studio, qua frequētia divinis officiis, sacris concionibus, & christianæ doctrinæ institutionibus; tum denique de Sanctissimi Patris mente & consiliis, quæ supra in diligentiorem festorum dierum sanctificationem adimplenda declaravī, si populi, Dei & Ecclesiæ præcepto satisfacere, ac debitæ erga Sanctissimum Patrem obedientiæ meritis, gratiæque suæ pontificiæ beneficio frui perpetuo voluerint.

Atque interim studium & observantiam meam Illustrissimæ & Reverendissimæ Dominationi Vestræ deferens, me esse ex animo profiteor.

Datum Varsaviæ die Junii 1775.





